

Oberst Gion Fidel Casanova e consorta Maria Barla ni Ina interessanta episoda historica d'ina famiglia Casanova che steva a Cumbel

da Claudio Casanova, Cuera/Cumbel

La veta e la famiglia da Gion Fidel Casanova

A handwritten signature in black ink, appearing to read 'Gion Fidel Casanova', with a large, sweeping flourish underneath.

Maletg 1: La sottascripziun da Gion Fidel Casanova dils 20 da settember 1816.

Dil temps che jeu frequentavel la scola primara legeva il plevon duront la s. messa dalla dumengia all'entschatta da november mintgamai il rodel dils morts¹. Da quels ein restai en viva memoria a mi: "Oberst Gion Fidel Casanova e consorta Maria Barla". Nus eran dil meini che Gion Fidel fussi in antenat dils Casanovas, burgheis da Cumbel. Quei constat denton buc. El ei burgheis da Lumbrein, nua ch'el ei naschius ils 8 da schaner 1768 sco feagl da Jacobus Udalricus Casanova e d'Anna Maria n. Collenberg². El ei entraus en la Cumpignia Salis-Zizers dalla Garda svizra a Paris 1786 sco fisilier ella vegliadetgna da 18 onns³ ed ha fatg carriera militar en giuvens onns sut il retg Louis XVI. En la medema cumpignia surveva da gliez temps sco sergent Duitg Baletta da Breil, pli tard bannerherr dalla Cadi. Igl ei da supponer che Gion Fidel seigi returnaus a casa suenter che la revoluziun franzosa ei rutta ora igl onn 1789, la quala haveva mess giu il retg e proclamau la republica ils 22 da settember 1792.


¹ Quei ei ina gliesta da persunas u da familias, per las qualas ei era vegniu fundau ina messa perpetna. Egl archiv dalla pleiv anflan ins pliras copias dil rodel dils morts. Quel vegn era numnaus rodel perpeten. Interessanta ei sia structura che suonda gl'uorden social da pli baul (clerus, noblezia e pievel cumin). Gl'empre vegnan ils paders missiunaris che han surviu a Cumbel numnai, suenter suondan ils spirituals oriunds da Cumbel e lu vegnan ils seculars ord la vischnaunca. Quella part entscheiva culs dignitaris e cala cun la glied cumina. Sco empre vegn "Signur Fendri Tieni Arpagaus" numnaus (bandierel ni bannerherr). Lu suondan pliras persunas dalla famiglia Vieli che han giu aultas scharschas ella Ligia Grischa ed el cumin dalla Lumnezia. Suenter vegnan ils officiers. Sco empre da quels cumpara "Signur Oberst Gion Fidel Casanova cun sia dunna Maria Barbara" e lu suondan "Signur Capitani Peder Antoni Arpagaus e Signur Litinent Murezi Antoni Arpagaus".

² Siu num entir secloma Joannes Casparus Fidelis. En quei rapport vegn per regla Gion Fidel, il num dil rodel, applicaus. En autras scartiras vegn el numnaus mo Fidel.

³ Tenor il „Mannschaftsrodel der französischen Gardekompanie Salis-Zizers vom 1. Mai 1789“. Bündnerisches Monatsblatt 1930, pagina 48.

Maletg 2: Dus schuldaus el survetsch franzos, 1786.

La gravura da F. Philipoteaux ed Henri Felix-Emanuel muossa seniester in grenadier e dretg in fisilier dil regiment dils Salis-Samendan. Gion Fidel Casanova ha surviu naven da 1788 en la truppa dils Salis-Zezras, gl'emprem sco fisilier. El purtava las medemas armas e la medema uniforma sco il schuldaus sin la vart dretga dil maletg.



Gion Fidel ha maridau ils 25 da settember 1792 a Cumbel la vieua Maria Barla Arpagaus, mumma da duas feglias. Dapi lu eis el staus da casa a Cumbel.



Maletg 3: Cumbel, nua che Gion Fidel ha viviu cun sia famiglia ils onns 1792 entochen 1816. Il baghetg davon sil maletg denter ils dus clavaus ei il mulin a Pela che Gion Fidel ha cumprau ils 21 da matg 1798. En quei contuorn schai era il prau „Enta Mulin“ ch’el ha acquistau ils 23 da zercladur 1801. (Carta postale entuorn 1900).

Els han giu dus affons, ina mattatscha ed in buob. La feglia Anna Emerita ei naschida ils 24 da december 1792 ed il feagl Jacobus Udalricus ils 28 d’october 1794. Dad el mauncan ils fastitgs. Igl ei da supponer ch’el seigi morts sco affon pign.

La consorta da Gion Fidel, Maria Barla, era per la secunda gada vieua. Ella ei naschida igl 1. da mars 1763 sco feglia da Christian Cathomen a Breil. Leu haveva ella maridau in Ballet ch’ei morts en giuvens onns. Sco vieua marida Maria Barla Ballet ils 26 da fevrer 1781 Melchior Antoni Arpagaus da Cumbel. Els han giu duas feglias ed in feagl ch’ei morts d’affon pign. La feglia Maria Teresa ha maridau Christian Vieli, in feagl dil miedi e landrechter Gieri Antoni Vieli da Cumbel, sesents a Razen. Christian e Maria Teresa ein setratgs entuorn 1815 Cumbel nua ch’els han manischau ils beins dalla famiglia Vieli en Lumnezia. Melchior Antoni miera gia ils 29 da november 1789 ella vegliadetgna da biebein 28 onns e vegn satraus a Cumbel. Maria Barla Arpagaus ei stada gia avon che maridar Gion Fidel differentas gadas madretscha⁴ a Cumbel⁵.

⁴ Entras il batten vegn in affon prius si ella cuminonza cristiana. In’impurtonta rolla giugavan leutier padrin e madretscha. Lur missiun era en emprema lingia da sustener ils geniturs ell’educaziun cristiana. Mo era aspects financials han giugau ina rolla tier l’elecziun dils padrins e dallas madretschas. El cass ch’ils geniturs murevan, havevan padrin e madretscha entochen viaden el 19avel tschentaner l’obligaziun da haver quitau dil figliol ni dalla figliola. Gia el 18avel tschentaner era ei usit en las vischnauncas sursilvanas ch’ils padrins e las madretschas devan in schenghetg da batten e mintgamai in biemaun da Daniev. Per quei motiv eran madretschas e padrins beinstonts giavischei. Quei pudeva era valer per Maria Barla.

Gion Fidel Casanova ei staus mistral dalla Lumnezia 1794 ni forsa gia in onn avon. Il datum da sia elecziun ei buca staus d'anflar. Tenor ils processuals dils 8 da zercladur 1807 ha capitani Fidel Casanova purtau plogn en num da Hercli Caviezel da Duin encunter Leander Fonteuna da Duin⁶. Sin cumin dils 21 da settember 1811 a Pleif ei Landamann Fideli Casanova vegnius eligius per dus onns sco Bey Botten, quei vul dir sco deputau dil Cussegl grond.

Casper Balzer Collenberg venda a Gion Fidel Casanova ils 21 da matg 1798 “siu mulin a Pela” e Franzestg Collenberg ils 23 da zercladur 1801 in prau “enta Mulin”⁷.

Gion Fidel e Maria Barla Casanova sco era lur feglia Anna Emerita ein stai differentas gadas padrin e madretschas da batten a Cumbel. Aschia Gion Fidel ils 28 da zercladur 1793, ils 2 d'uost 1793⁸, ils 13 da fenadur 1801 ed ils 11 da fenadur 1812. Gion Fidel ei staus ils 10 da schaner 1802 perdetga allas nozzas da stalter Balthasar Otto Antonius Arpagaus ed Ursula Monica Arpagaus ensemen cun Joannes Simon Casanova. Quei ei mussaments ch'el steva quels onns a Cumbel. Maria Barla ha suenter sias nozzas cun Gion Fidel funcziunau vinavon sco madretscha⁹. Anna Emerita, lur feglia, ei era stada differentas gadas madretscha a Cumbel¹⁰. Ils 9 da november 1813 eis ella stada perdetga da nozzas a Christianus Mauritius Arpagaus e Maria Ursula Arpagaus.

Maria Barla ei morta igl 1. da fenadur 1815 ella vegliadetgna da 52 onns e 4 meins ed ei vegnida satrada a Cumbel. Cun caschun dil matrimoni da Franciscus Kemerli (accola Cumbelii, buca burgheis da Cumbel) e Ma. Catharina Montalta (ex Morissen) dils 15 da schaner 1816 ei Dominus Landamanni et Colonello Fidelius Casanova staus buns per els.

Anna Emerita ha maridau ils 26 da mars 1816 a Cumbel Joannes Josephus Casaulta da Lumbrein. Sco perdetgas ein il bab dalla spusa, Gion Fidel, ed Anna Christina Caviezel stai. Igl ei da supponer che Gion Fidel seigi staus entochen lu a Cumbel.

En Frontscha ei denton la monarchia dils Bourbons vegnida restaurada sut il retg Louis XVIII (1814/15–1824). Ils 20 da settember 1816 engascha Gion Fidel Casanova a Cumbel Gion Gelly Caveng, in giuvenot da 18 onns, sco schulda en sia cumpignia.

⁵ Aschia ils 15 da fenadur 1788 da Maria Margarita Collenberg, ils 17 da fenadur 1789 da Chrest Fidel Casanova, ils 31 da schaner 1790 da Chrest Murezi Arpagaus ed ils 14 d'uost 1791 da Vinzens Antoni Casanova.

⁶ Archiv privat da dr. Ramun Vieli, oz egl archiv chantunal Grischun.

⁷ Archiv privat da dr. Ramun Vieli, oz egl archiv chantunal Grischun.

⁸ In destin tragic vul ch'ils babs (Jacob Philip Arpagaus e Hasper Cabalzar) dils dus figliols da Gion Fidel ein curdai ella battaglia dils 3 da matg 1799 encunter ils Franzos a La Punt.

⁹ Ils 18 da fevrer 1800, ils 29 da settember 1802, ils 13 da settember 1808 ed ils 9 da november 1814.

¹⁰ Ils 10 da mars 1806, ils 3 da mars 1808, ils 15 da december 1808, ils 21 da schaner 1812, ils 23 da mars 1812, ils 15 da matg 1812 ed ils 9 da fenadur 1815.

Maletg 8: Contract militar denter Gion Fidel Casanova ed in giuven da Cumbel.



El ei returnaus en Frontscha nua ch'el ha cumandau ina cumpignia el battagliun grischun dil regiment svizzer el survetsch da sia maiestad Louis XVIII, retg da Frontscha e Novara. Gion Fidel ei morts tenor la brev dil caplon campester, sur Carli Antoni Mareischen da Parsons, ils 19 da zercladur 1818 a Clermont ella vegliadetgna da 50 onns e miez. En siu stagl ha il retg numnau ils 25 d'uost 1818 sco capitani Christian Francestg Florin da Vaz su che surveva sco adjudant-major el regiment dils Salis¹¹.

Gion Fidel Casanova – ina persunalitad interessanta

Gion Fidel Casanova ei entraus en la Cumpignia Salis-Zizers dalla Garda svizra a Paris 1786 sco fisilier ed ha fatg carriera militar en giuvens onns sut il retg Louis XVI. 1799 ha el surviu sco capitani ellas mesas-brigadas helveticas. 1805 eis el capitani dalla milissa grischuna e 1813 litinent-colonel e cumandant dil II. battagliun grischun¹². El ei vegnius desarmaus sin basa dalla proclama dils 20 da mars 1799 dalla Regenza grischuna per grazia franzosa (Bavier) sco tons auters umens da Cumbel. El ha stui dar giu ina buis ed ina baionetta.

¹¹ Document egl archiv dalla famiglia Banaston, oz egl archiv chantunal Grischun.

¹² Alexander Pfister. Ils Grischuns sut Napoleon Bonaparte. Annalas XXXVII, 1923, pagina 93.


Maletg 4: Pader Placidus a Spescha sco alpinist.



Capitani Fidel Casanova ha giugau ina rolla duront l'uiara dils Franzos 1799/1800 el Grischun. El ha susteniu pader Placidus a Spescha en sia missiun, surdada ad el all'entschatta matg 1799 dalla Regenza a Cuera, da quietar ils Sursilvans e d'influenzar quels da buc attaccar pli ils Franzos. Placidus a Spescha descriva co el ei vegnius accumpignaus sin siu viadi da Cuera encunter Flem dil capitani Fidel Casanova da Cumbel e da dus Lumnezians, in da Murissen ed in da Cumbel. Tier ils emprems contacts cun las avonguardias dils Sursilvans sut Flem damonda Gion Fidel Casanova quellas, schebein ils Lumnezians fetgien era part dalla

revoluziun. Rispundend ellas gie e schend che dapertut entuorn seigi vegniu tucchau da stuornas, di el al pader: „Igl ei nuot pli da far e nus mein mo en prighel da veta. Lein returnar pia a Cuera.“ Mo il pader a Spescha ha vuliu ademplir sia missiun ed ei ius persuls encunter Laax, nua ch'el ei fruntaus danovamein cun in'avonguardia dalla milissa sursilvana, alla quala el ha vuliu surdar ina brev pils menaders. El ha saviu urbir ora nuot ed ha per buca vegnir pigliaus dalla milissa stuiu fugir dalla val giu a Sagogn, da leu sur il Rein a Castrisch, Sevgein, sut Riein giu viers il Glogn e si a Porclas per arrivar a Rumein.

Maletg 5: Porclas sin territori da Cumbel entuorn 1880.
(Ina gravura da T.v. Eckenberger).



Sin siu viadi da Rumein encunter Mustér (el vuleva cun tutta forza purtar agid alla claustra) ei pader a Spescha vegnius tenius si dils Franzos a Trun. El ha stuiu turnar anavos a Glion e quei puspei sut schurmetg dil capitani Fidel Casanova. Suenter esser staus sur notg a Glion, schurmegiaus dalla truppa franzosa, eis el turnaus anavos en Lumnezia, nua ch'el ha anflau dunsena a Cumbel tier la misterlessa Maria Barla, la dunna da Gion Fidel Casanova.

Placidus a Spescha scriva co ina delegaziun lumneziana cun treis simpatisants dils Franzos (“Wachmeister Joan Joseph Columberg von Murissen, Herr Landammen Julius Blumenthal von Villa und den Herrn Hauptmann Arpagaus von Combel”) ei ida a Glion ed ha cun agid da capitani Fidel Casanova, ch'era aunc engaschaus tier l'armada franzosa, saviu contrahar culs Franzos da schanegiar la Lumnezia e da buca darsentar e sblundergiar quella. Quei ei reussiu. La Lumnezia ha persuentar stuiu pagar ina contribuziun d'uiara Pli tard ha capitani Fidel Casanova spindrau dils Franzos a Mustér il frater Ursicinus Genelin da Disla. Pader a Spescha remarca che la delegaziun lumneziana hagi survegniu ina schliata paga per sia prestaziun per la Lumnezia suenter ch'ils Austriacs ein puspei returnai el Grischun. Per esser segirs ha capitani Fidel Casanova stuiu emigrar culs Franzos. Mo pli tard eis el puspei turnaus a Cumbel, nua ch'el ei documentaus igl onn 1801. Igl ei da supponer ch'era capitani Arpagaus da Cumbel seigi emigraus. Il dus auters Lumnezians ein vegni accusai ed ein stai per dus onns en perschunia austriaca. Duront il temps dalla mediaziun (1803–1813) ha il Cussegl grond ordinau ina nova organisaziun militar ch'ei entrada en vigur pér 1809. Suentar che Napoleon ha pers igl october 1813 sper Leipzig la battaglia gronda encunter ils alliai ha la Tagsatzung

dalla Confederaziun Helvetica proclamau la neutralitad. Per schurmegiar ils cunfins sunter il Rein ha ella clamau 20'000 umens sut las armas. 5000 da quels ein vegni pustai el Grischun sut il commando da colonel Ziegler, al qual era il battagliun grischun che vegneva cumandaus da colonel Fidel Casanova apparteneva. All'entschatta digl onn 1814 steva il battagliun dils Grischuns aunc en survetsch. Ei era il temps che Baron Heinrich von Salis ha empruau cun ina revolta militar d'ereger puspei igl uorden vegl. Colonel Casanova ch'era attaschus als von Salis fuss staus persunter, auters officiers eran denton encunter. Il plan d'ina revolta militar han els perquei stui schar curdar. Perencunter ha Heinrich von Salis organisau ina revolta dils purs encunter il Cussegl grond a Cuera.

Ils merets da Gion Fidel Casanova

Gion Fidel Casanova ei sedistinguius sco bab da famiglia e vischin da Cumbel, sco officier e sco politicher lumnezian.

Ins remarca co el e sia famiglia ein stai a diposiziun sco padrin e madretscha e sco perdetga da nozzas a Cumbel. Els ein pia stai integrai ella veta dils vischins dil vitg ed han era giu influenza leu. Lur muntada per Cumbel semuossa era suenter la mort el rodel perpeten, nua ch'els vegnan numnai enteifer ils dignitaris dalla vischnaunca.

Maletg 6: In passadi ord il rodel perpeten da Cumbel screts da Pader Nicola d'Alessandria igl onn 1892: „ Sign. Oberst Gion Fidel Casanova e sia donna Maria Barbara.“ (Archiv parochial da Cumbel)

The image shows a handwritten list titled "Model Perpeten" and "Seculars de questa Vischnaunca". The list contains the following entries:

Vignud Fordini Toni	Wagnagaus cum sia donna	2
Wagner Wili	cum sia donna Usla	2
Gion Stefan Schomann	Wili cum sia donna Maria	3
Pa e. Leo	ful Augustin	3
Gion M. Mucor	Anton Wili cum sia donna	3
Wagnud Augustin	Gion Anton cum sia donna	3
Gion Maria Dorothea	e Leo ful Gion Wili Mucor	3
Anton Dorothea	Maria Wili ed il Wagnud	3
Deutor Michael	Otto Anton	6
Dorothea	Maria Barbara Antonia Wili	6
Sign. Casanova	Peter Wili	1
Sign. Maria	Theresa Wili	1
Wagn. Commandant	Cristian Ulrich Dorothea	1
Wagnud	Dorothea Antonia Wili	1
Sign. Oberst	Gion Fidel Casanova cum sia donna Maria	5
Barbara	Dorothea Maria Casanova	5
Wagn. Perpeten	Peter Anton Dorothea	5

Ins astga supponer che Gion Fidel e sia consorta Maria Barla erien beinstonts. Era igl acquist dil mulin a Pela igl onn 1798 e treis onns pli tard d'in frust enta Mulin ein indezis per sia activitad economica el vitg da Cumbel. Il fatg che Gion Fidel ha saviu engaschar umens giuvens da Cumbel sco mercernaris documentescha sia influenza el vitg.

Maletg 7: La gravura contemporanea presenta ina scena dalla battaglia dils 3 da matg 1799 a La Punt. Il landsturm dalla Surselva haveva scatschau anavos las truppas franzosas d'occupaziun entochen Cuera. Suenter eis el vegnius terraus dils husars franzos ch'ei curri en agid a lur truppa. (Biblioteca centrala, Turitg)



Sco officier ha el contonschiu el Grischun duront il temps dalla mediaziun (1803–1813) in ault post sco cumandant dil battagliaun grischun. Quei vul dir ch'el ei staus distinguius sco meinatruppas e ch'el era respectaus sco tal el Grischun.

Dil temps dall'invasiun franzosa el Grischun (1799) ha Gion Fidel empruau da mediar e da tener anavos ils Sursilvans da cumbatter ils Franzos. El ha denton buca saviu impedir quei e gnanc che la milissa lumneziana ei suandada al clom d'uiara dalla Surselva sura. Ella battaglia dils 3 da matg 1799 a La Punt encunter ils Franzos ein 45 umens ord la Lumnezia curdai, 12 mo ord la pleiv da Cumbel.

Gion Fidel ha surviu alla Lumnezia sco mistral e pli tard (1811-1812) sco deputau el Cussegl grond (“Bey Botten”). El ei sestentaus fermamein pil beinstar dalla Lumnezia. Quei ha el era demussau si cun siu agid ellas contractivas culs Franzos da buca darsentar e sblundergiar la val. Gion Fidel Casanova, il qual ha fatg ina respectabla carriera civila e militar e prestau bia per sia patria, ha deplorablamein suenter la mort da sia consorta Maria Barla bandunau Cumbel ed ei puspei returnaus sco cumandant d'ina cumpignia el battagliaun grischun dil regiment svizzer en Frontscha, nua ch'el ei morts. El mereta da restar a nus en pia memoria sco quei ch'el vegneva numnaus el rodel perpeten dalla pleiv da Cumbel: “Oberst Gion Fidel Casanova e consorta Maria Barla”.

Ils vegnentssuenter da Gion Fidel Casanova

La feglia Anna Emerita ei naschida ils da 24 da december 1792 ed il feagl Jacobus Udalricus ils 28 d'october 1794. Quel ei probablamein morts gia d'affon.

Anna Emerita ha maridau ils 26 da mars 1816 Gion Giusep (Joannes Josephus) Casaulta da Lumbrein ch'ei naschius ils 24 da fenadur 1796 sco feagl da Balthasar Conradus Casaulta e da Maria Monica Collenberg a Lumbrein. Els stevan lu a Cumbel. Lur empren affon ei naschius morts ils 20 d'uost 1816. Ils 22 da settember 1818 ei Fidelis Mauritius Josephus naschius sco pupratsch. Gion Giusep era 1818 gia scarvon ni Landschreiber. Il scarvon era igl actuar da cumin. El scriveva ils protocols da cumin e las sentenzias dalla dertgira. Gion Giusep ei vegnius eligius ils 21 da settember 1819 a Pleif per in onn mistral e delegau el Cussegl grond ella vegliadetgna da mo 23 onns. Ina tala elecziun custava. Ils candidats stuevan esser beinstonts u derivar d'ina famiglia beinstonta. Quei pudeva valer per Gion Giusep.

Anna Emerita e Gion Giusep ein documentai la davosa gada a Cumbel sco madretscha ils 20 da matg 1821 e sco padrin ils 22 da schaner 1823.

Entuorn ils onns 1825/1828 han Gion Giusep e sia famiglia bandunau Cumbel ed ein secasai a Lumbrein. Gion Giusep cumpara leu ils 4 da mars 1829 sco padrin ed Anna Emerita ils 8 da mars 1829 sco madretscha.

Ils 11 d'october 1829 miera in affon dad els ella vegliadetgna da quater onns e vegn satraus a Lumbrein. Ils 23 da settember 1830 nescha lur feglia Maria Monica Josepha Philipina. Ils 15 da december 1831 miera Gion Giusep suenter ina pli liunga malsogna dil cor ella vegliadetgna da mo 35 onns e vegn satraus ils 18 da december "ad loco familia Roman" a Lumbrein. Strusch in onn pli tard, ils 11 da november 1832, ei la feglia Maria Monica morta cun dus onns e vegnida satrada "propre Patrem in Sepultris familia Roman".

Il destin ha buca vuliu bein cun Anna Emerita. Cun 37 onns eis ella daventada vieua e restada anavos suletta cul feagl Fidel Murezi Giusep, in pupratsch da 13 onns, suenter haver gia piars treis affons pigns entras la mort.

Ils 27 d'uost 1833 marida Anna Emerita a Lumbrein Placidus Valentinus Derungs da Vignogn. Ils 16 da schaner 1834 nescha la feglia Maria Monica Josepha Philipa Derungs. Il feagl Fidelis Mauritius Josephus, il pupratsch, ei morts ils 6 d'avrel 1847 ella vegliadetgna da strusch 28 onns. Ina liunga malsogna haveva tenui el ils davos tschun onns e miez en letg. El ei vegnius satraus a Lumbrein. Placidus Valentinus Derungs ei morts ils 25 d'uost 1863 ella

vegliadetgna da 62 onns ed ei vegnius satraus a Vignogn. Pertuccont la cuntinuaziun dalla veta d'Anna Emerita e sia feglia mauncan las informaziuns.

Ei fuss interessant d'enconuscher ils motivs dalla famiglia Casaulta d'ir naven da Cumbel e da secasar a Lumbrein. Tgei ei capitau cun lur beins a Cumbel? Plinavon caztgass ei da saver dapli davart la lavur dil scarvon e mistral Gion Giusep Casaulta.

24 d'uost 2009 / correcturas ils 31da schaner 2016

Cumpariu el Calender Romontsch 2010 pagina 253 -262.

Fontaunas:

Cudischs parochials da Cumbel e da Lumbrein

Maissen Felici: Historia dalla pleiv da Cumbel, Casa editura Desertina, Mustér 1983.

Metz Peter: Geschichte des Kantons Graubünden I, 1798-1848, Calven Verlag, Chur 1989.

Pfister Alexander: Ils Grischuns sut Napoleon Bonaparte. Annalas 37, 1923, paginas 89-130.

Pieth Friederich und Hager P. Karl OSB: Pater Placidus a Spescha, Sein Leben und seine Schriften,

Verlag von Benteli AG, Bümpliz-Bern 1913.

Friederich Pieth: Bündner Geschichte, F. Schuler, Chur 1945.

Historisch-Biographisches Lexikon der Schweiz, Zweiter Band 1924.